
ИЧКИ ИШЛАР ҲОДИМИГА ПОРА ТАКЛИФ ҚИЛГАН ҚИМОРБОЗЛАРГА ХУКМ ЎҚИЛДИ.

Жиноят ишлари бўйича Фарғона вилоят Қўштепа туман судида пора бериш билан боғлиқ жиноий иш кўриб чиқилди.

Бу жиноят ишининг эътиборли жиҳати шундаки, судланувчилар ўз айбларини яшириш учун Қува тумани ички ишлар ходимиغا пора таклиф қилишган.

Хуллас, судланувчилар Қувалик И.Ю. ва И.А.лар қимор ўйнашаётган пайтида Қува тумани ИИБ профилактика инспектори томонидан ушланган ва уларга нисбатан тегишли ҳужжатларни расмийлаштирган.

Судланувчилар ўз айбларини яшириш мақсадида ўзаро тил бириктириб таниши Ж.А. орқали ИИБ профилактика инспекторига уларга нисбатан юритилган ҳужжатларни судга юбормаслик ҳамда кейинчалик уларнинг қимор ўйинларига тўсқинлик қилмаслик эвазига пул таклиф қилишган.

Ўз қасамёдида содиқ қолган Қува тумани ИИБ профилактика инспекторининг билдиргисига асосан Ўзбекистон Республикаси Бош прокуратураси ҳузуридаги иқтисодий жиноятларга қарши курашиш департаменти Фарғона шаҳар бўлими ва Ўзбекистон Республикаси ИИБ ЎХБ Фарғона вилояти бўлими ходимлари томонидан 2020 йил 17 январда ўтказилган тезкор тадбирда, қиморбозлар 800 минг сўм пулни профилактика инспекторига пора тариқасида бераётган вақтида ушланган. Мазкур тадбир давомида юқоридаги манзилда бир гуруҳ шахслар томонидан яна қимор ўйини ўйналаётганлиги ҳам фош этилди. У ердан 650 минг сўм миқдоридаги пуллар, қарта ва ўйин тошлари ҳолислар иштирокида, ашёвий далил сифатида олинди.



Суд мажлисида судланувчилар ўз қилмишларига тўлиқ иқдор бўлдилар. Судланувчилар Ўзбекистон Республикаси ЖКнинг 211-моддасида назарда тутилган жиноятни яъни пора бериш жиноятини содир этганликда айбли деб топилиб, қилмишларига яраша қонунда белгиланган жазо чоралари тайинланди, ашёвий далил тариқасида олинган пуллар эса давлат фойдасига мусодара қилинди.

Авазжон Эргашев,

Жиноят ишлари бўйича Қўштепа туман суди раиси.

2020-05-27 20:29:07